

四庫全書

集部

欽定四庫全書

集部

宋詩紀事卷十三

詳校官給事中臣鄧文泮

侍讀臣孫球覆勘

總校官進士臣繆琪

校對官中書臣朱斡

謄錄監生臣李學瞻

欽定四庫全書

宋詩紀事卷十三

錢塘厲鶚撰

元絳

絳字厚之錢唐人天聖八年進士神宗朝累官翰林學士拜參知政事出知亳州改潁州致仕卒贈太子少師諡章簡有玉堂集

石林詩話元厚之知荆南夢至仙府三人者聯名書旁有告之曰君三人蓋兄弟也覺而思之莫知所謂未幾入為學士韓持國維揚元素繪先已在院一日書名三人名皆從絞絲始悟夢

兄弟之意已而持國元素外補厚之京尹後三年復與元素還職而鄧文約綰相繼為直院則三人之名又皆從絞絲許大夫選作四翰林詩紀其事厚之和云聯名適似三株樹傳玩驚看五朶雲亦一時之異也

詔修兩朝國史開局日賜筵史院和首相吳公席

上韻

殿帷昕對罷省戶雨陰餘詔賜堯尊酒人探禹穴書變

龍方客右班馬蓋徒歟徑醉俄歸弁雲西見日車

揮塵後錄

郡守章公岵五日開宴會九老於廣化寺次韻

五日佳辰郡政閒
延賓談笑豁幽關
閭門歌舞尊壘上
林屋烟霞指顧間
德應華星臨穎尾
年拘皓髮下商顏
昌花美酒疎鐘永
坐見斜暉隱半山

中興紀聞徐師閔字聖徒仕至朝議大夫退老
于家日治園亭以文酒自娛樂時太子少保元
公絳正議大夫程公師孟朝議大夫閻丘公孝
終亦以安居歸老因相與繼會昌洛中故事作
九老會章岵為郡守大置酒合樂會諸老於廣
化寺又有朝請大夫王琬承議郎通判蘇溫與
焉王賦詩為倡諸公屬而和之以為吳門盛事

題鼓山元公亭

誰書吾姓揭亭顏棟宇飛騰氣象完谷口秋風吹鬢髮
海東朝日上闌干地高頓覺羣山小天近須知六合寬
三到巖扉殊不厭異時長向畫圖看

淳熙三山志

在禁林時有懷荆南舊遊

去年曾醉海棠叢聞說新枝發舊紅昨夜夢回花下飲
不知身在玉堂中

海棠譜

趙潛叔殉節詩

轉戰譙門日欲晡空拳猶自把戈鈇身垂虎口方安坐

命在鴻毛更疾呼柱下杲卿存斷節袴中杵白得遺孤
空餘三尺英雄氣不媿山西士大夫

後村詩話皇祐中懷賊犯康州閩郡潰去惟守
臣趙師旦死之妻方產子棄之草間亂後訪之
尚呱呱然元公挽之云云

元豐辛酉冬予解組歸吳明年過故同年朱光祿
舊居周覽園榭感事作詩以詒伯原

白頭重到故人家境是人非起嘆嗟三徑未荒陶令菊
四時長放庾郎花林風光動藏鶯葉溪浪痕生宿鷺沙

肯構有材移病久會憑詩酒傲烟霞

蘇州府志

句

仙驥簫雲穿仗下佛花吹雨布天流

石林詩話元豐中久旱裕陵禁中齋禱甚力一夕夢有僧乘馬馳空中口吐雲霧覺而大雨翌日命中貴人物色於相國寺五百羅漢中至第十三尊略彷彿即迎入內觀之正所夢也元參政厚之喜雨句云云蓋記此事

刁約

約字景純潤州人衍之子天聖八年進士嘉祐

中以兵部員外郎集賢校理知越州

使契丹戲作

押燕移離畢看房賀趺支餞行三匹裂密賜十貌狸

夢溪筆談刁景純使契丹戲作云云移離畢官名如中國執政賀趺支如執衣防閑匹裂小木罌以色綾木為之如黃漆貌狸形如鼠而大穴居食穀梁北人為珍膳味如豚肉而脆

遊五洩山

西源窮盡到東源直注層崖五磴泉真境無由追汗漫
勝游聊得弄潺湲風生虎嘯層崖底月上猿啼古木巔

只待歸來林下去好同靈一此安禪

諸暨縣志

朱公綽

公綽吳人天聖八年進士曾為鹽官令

與宋子京唱酬牡丹詩

仁帥安全蜀祥葩育至和地寒開既晚春曙力終多翠

帶遮蜂蝶朱闌隔綺羅殷懃憑驛使光景易蹉跎

成都文類

句

諫草焚來應見史橐金散盡只畱詩

劉諷都官致仕古今詩話

蔡襄

襄字君謨其先自光州固始入閩家仙遊又遷
莆田遂為莆田人天聖八年進士累官龍圖閣
學士知開封府徙知泉州召為翰林學士乞為
杭州拜端明殿學士以往治平四年卒乾道中
謚忠惠有集

茗溪漁隱叢話余觀東坡荔枝歎注謂大小龍
茶始于晉公而成于蔡君謨歐陽永叔聞君謨
進小龍團歎曰君謨士人也何至作此事今年
閩中監司乞進鬪茶許之故其詩云武夷溪邊

粟粒芽前丁後蔡相籠加爭新買寵各出意今年鬪品充官茶

四賢一不肖詩

中朝驚鵠何儀儀慷慨大體能者誰之人起家用儒業
馳騁古今無所遺當年得從諫官列天庭一露胸中奇
失身受責甘如薺沃然華實相歲粃漢文不見賈生久
詔書曉落東南涯歸來俯首文石陞尹以京兆天子毗
名都翼翼郡國首里區百萬多占辭豪宗貴倖矜意氣
半言主上承其頤昂昂孤立中不倚傳經決訟無牽羈

老姦黠吏束其手衆口和附歌且怡日朝黃幄邇天間
帝前大畫當今宜文陳疏舉時密啟此語多祕世莫知
傳者籍籍十得一者已足為良醫一麾出守蕃君國
惜此智慮無所施吾君睿明廣視聽四招俊乂隆邦基
廷臣諫列復籍口安得長喙號丹墀晝歌夕寢心如疚
咄哉汝憂非汝為

右范仲淹

南方之強君子居卓然安道襟韻孤詞科判等屢得雋
呀然鼓焰天地鑪三年待詔處京邑斗粟不足榮妻孥

耳聞心慮朝家事螭頭北奏帝曰都校書計課當序進
麗賦集仙來顯塗誥墨未乾尋已奪不奪不為君子儒
前日希文坐言事手題敕教東南趨希文鯁亮素少與
失勢誰復能相扶嶄然安道生頭角氣虹萬丈橫天衢
臣靖胸中有至語舉啗不避蕭斧誅使臣仲淹在廷列
日獻陛下之嘉謨刺史榮官雖重任奈何一郡卷不舒
言非由位固當罪隨漕扁舟盡室俱炎陬此去數千里
橐中狼藉唯蠹書高冠長佩叢闕下千百其羣訶爾愚

吾知萬世更萬世懍懍英風激懦夫

右余靖

君子道合久以成小人利合久以傾世道下衰交以利
遂使周雅稱嚶鳴煌煌大都足軒冕綽有風采為名卿
高名重位蓋當世退朝歸舍賓已盈脅肩諂笑不知病
指天報遇如要盟一朝勢奪德未改萬鈞已與毫釐輕
畏威諛上亦隨毀矧復鼓舌加其評逶迤陰拱質氣厚
兩耳塞豆心無營嗚呼古人不可見今人誰與明章章
節義尹師魯飭躬佩道為華榮希文被寵激人怒君獨

欣慕如平生抗書轂下自論劾惟善與惡宜彙征削官
竄逐惟適楚一語不挂離騷經當年亦有大臣逐朋邪
隱縮無主名希文若果事姦險何此吉士同其聲高堂
本欲悟人主豈獨區區交友情

右尹洙

先民至論推天常補袞扶世為儒方園冠博帶不知本
樗櫟安可施青黃帝圖日盛人世出今吾永叔誠有望
虛心學古貴適用異端莫得窺其牆子年五月范京兆
服天子命臨鄱陽二賢拜疏贖其寵勢若止沸反揚湯

敕令百執無越位諫垣何以敢封囊哀求激憤亦復奮
強食不得下喉吭位卑無路自聞道日視雲闕高蒼茫
裁書數幅責司諫落筆駉驥騰康莊刃迎縷析解統要
其間大意可得詳書曰希文有本末學古通今氣果剛
始從理官來祕閣不五六歲為天章上心倚若左右手
日備顧問鄰清光苟爾希文實邪佞曷不開口賦否臧
陰觀被遣始醜詆推枯拉朽奚為強倘曰希文實賢士
因言被責庸何傷漢殺王章與長倩當時豈曰誅賢良

惟時諫官亦結舌不曰可諫曰罪當遂令百世覽前史
往往心憤涕泗滂斯言感切固已重讀者不得令激昂
肯圖反我為怨府袖書乞憐天子苟謫官一邑固分耳
恨不剖腹呈琳琅我嗟時輩識君淺但推藻翰高文場
斯人滿腹有儒術使之得地能弛張皇家太平幾百歲
正當鑑古修紀綱賢才進用忠言錄祖述聖德垂無疆

右歐陽修

人稟天地中和生氣之正者為誠明誠明所鍾皆賢傑

從容中道無敵傾嘉言讜論范京兆激姦糾謬揚王庭
積羽沈舟毀銷骨正人無徒姦者朋主知膠固未遐棄
兩轡五馬猶專城歐陽祕閣官職卑欲雪忠良無路岐
累幅長書挾幽憤一責司諫心無疑人謂高君如撻市
出見搢紳無面皮高君搆書奏天子游言容色仍怡怡
反謂希文謀疎濶投彼南方誠為宜永叔忤意竄西蜀
不免一中讒巧辭汲黯嘗糾公孫詐弘于上前多謝之
上待公孫禮益厚當時史館猶刺譏司諫不能自引咎

復將已過揚當時四公稱賢爾不肖讒言易入天難欺
朝家若有觀風使此語請與風人詩 右高若訥

澠水燕談景祐中范文正公知開封左右言公朋黨黜知饒州余靖安道論救坐貶尹師魯洙言臣與仲淹義兼師友當從坐貶監鄆州稅歐陽永叔移書責司諫高若訥若訥怒繳其書降授夷陵縣蔡君謨作四賢一不肖詩四賢謂希文安道師魯永叔不肖謂若訥也布在都下人爭傳寫鬻書者市之頗獲厚利

遊鼓山題靈源洞

郡樓瞻東方嵐光瑩人目乘舟逐早潮十里登南麓雲

深翳前路樹暗迷幽谷朝雞亂木魚晏日明金屋靈泉
注石竇清吹出篴竹飛毫劃峭壁勢力忽驚觸捫蘿躋
上峯太空延眺矚孤青浮海山長白挂天瀑况逢肥遯
人性尚自幽獨西景復向城淹留未云足

上元應制

高列千峯寶炬森端門方喜翠華臨宸遊不為三元夜
樂事還同萬衆心天上清光留此夕人間和氣閣春陰
要知盡慶華封祝四十餘年惠愛深

夢中作

天際烏雲含雨重樓前紅日照山明
嵩陽居士今何在
青眼看人萬里情

書小閣壁上

綽約新嬌生眼底侵尋舊事上眉尖
問君別後愁多少
得似春潮夜夜添

嘉禾郡偶書

畫道瑤池瓊樹新仙源尋到不逢人
陳王也作驚鴻賦

未必當時見洛神

宿漁梁驛

庭樹疎疎河漢低
瓦溝霜白月平西
寒鴉不奈單棲苦
落泊驚飛到曉啼

留別舊居花檻

別意起中夕
出門風吹衣
側月光艷薄
餘花香氣微
清尊歲相向
欲去心有違
殘葩勿盡放
主人行亦歸

以上
蔡忠

惠公集

寒食遊西湖

知福州作

山前雨氣曉才收，水際風光翠欲流。
盡處旌旗停曲岸，滿潭鉦鼓競飛舟。
浮來烟島疑相就，引去沙禽好自由。
歸騎不令歌吹歇，萬枝燈燭度花樓。

淳熙三山志

王素

素字仲儀，旦季子。賜進士出身，擢知諫院，出知成都府。復尹開封。熙寧初入為通進，銀臺司轉工部尚書卒。諡懿敏。

述夢

似去華胥國裏來，雲霞深處見樓臺。
月光冷射雞窗急，

驚覺遊仙夢一迴

詩話總龜公任御史日嘗夢中至玉京黃閣殿
上有紺服翠冠者曰吾東門侍郎公則西門侍
郎也昔以奏牘玉帝前語傷鯁訐遂謫于世公
夢迴題此

彭思永

思永字季長廬陵人舉進士累擢天章閣待制
河北都轉運使治平中召為御史中丞熙寧中

以戶部侍郎致仕卒

絕句

爭利爭名日日新
滿城冠蓋九達塵
一聲雞唱千門曉
誰是高眠無事人

過庭錄

趙師民

師民字周翰青州臨淄人第進士官天平軍節度推官歷天章閣侍講刑部郎中判宗正丞有集

張耒明道雜志先君嘗從趙周翰授易與周翰
稍密先君嘗與客語周翰作詩極有風味是溫
飛卿韓致光之流而世以朴儒處之非也

向來

向來情思已陳陳旅恨無端不及春潘子形容傷白髮

沈郎文字暗丹脣

明道雜志

句

露臺枉惜千金費卻把銅山賜幸臣

風月堂詩話趙周翰詠漢文帝云云可與李義
山不問蒼生問鬼神之句並驅爭先

麥天晨氣潤槐夏午風清
委地露花啼曉恨拂隄烟

柳弄春容

歷代吟譜

霜女遺靈長著素玉妃餘恨結成酸

梅

明道雜志

范師道

師道字貫之長洲人仲淹姪天聖九年進士知

廣德縣擢侍御史以論事忤宰相劉沆出知常

州復召為起居舍人同知諫院出知福州復入

為三司鹽鐵副使終直龍圖閣知明州有集

曰

按宋登科記天聖九年停貢舉拔萃四人師道當是中拔萃科

題隱圃贈蔣希魯

勇退人難事明公識慮長
波濤濟舟楫霜雪見松篁
林下開前圃花閒出亞槍
二疏良宴會老杜好篇章
道向清來勝機于靜處忘
當除印如斗試一較閒忙

中吳紀聞

天平山

天地萬物閒或有奇勝迹
見賞能幾人不知今與昔
吳門多好山天平為峻極
旦暮常白雲表裏皆珍石
烟嵐

十里光松桂四時色我因一縱遊煩襟為開釋感古懷
君子翻然長太息樂天賞雲泉詩章何歷歷垂今數百
年繼者漠然寂閒遇希文來雙旌守鄉國行春三讓原
吟哦盡所得子美天與才尋幽多採摭賦詩五十言平
地黃金擲三賢固有名山資亦輝赫此去還幾年不逢
好事客

吳郡志

滕涉

涉天聖中諫議大夫

游泰山靈巖寺

山半舊招提，捫蘿躡石梯。
佳名標四絕，勝境出三齊。
殿古烟霞窟，庭深檜栢蹊。
嶽靈分地界，雲險接天倪。
香篆清風裊，松廊翠嶽低。
飛塵無路入，幽鳥隔巖啼。
破夢泉聲急，飄涼竹韻淒。
微陽生頂上，殘月落峯西。
暫到猶塵慮，長居信覺迷。
致君功業就，向卜此幽棲。

靈巖詩集

孔道輔

道輔字原魯，宣聖四十五世孫，舉進士，天聖閒。

為右正言累官御史中丞出知鄆州卒贈尚書
闕里夫子廟

秦火自焚寧害聖金絲堂壁闕家書典墳啟發皆天意
非謂共王好治居

山東通志

唐介

介字子方江陵人擢進士第為殿中侍御史劾
宰相文彥博貶春州別駕神宗朝拜參知政事
與王安石爭論不勝憤疽發背卒贈禮部尚書

謚質肅

謫官渡淮風欲覆舟而作

聖宋非狂楚清淮異汨羅平生仗忠信今日任風波舟
楫顛危甚龜鼃出沒多斜陽幸無事沽酒聽漁歌

合璧
事類

前集

碧落洞

余生本孤拙所志在雲石薄宦偶纏鎖未遂林泉適邇
來備臺選幸一當言責狂愚抵罪辜遽從邊徼謫區區

數十里車馬倦行役湏陽頗善地解轡喜安席官散無
所事度日多閒隙太守蘓宣甫邀我訪竒跡西山有石
室疑是靈仙窟脩然烟徑入訝若天門闢中瀉一溪清
傍映千峯碧萬穴滴瑤乳兩崖張翠帟爽氣來先秋昏
嵐生未夕不知造化意何為置窮僻周生說到難斯文
不虛撫怪容誠莫狀勝踐今始獲暫已瑩耳目久覺生
虛白拂拭纓上塵回頭謝朝客雖非吾土樂聊以慰竒
隻聖恩未放還屢遊君莫惜

廣東通志

李師中

師中字誠之應天府楚丘人舉進士神宗朝歷
官天章閣待制河東都轉運使知泰州貶和州
團練副使安置徙單州復分司南京提舉太極
觀卒有集

贈御史唐介貶英州別駕

進退格

孤忠自許衆不與特立敢言人所難去國一身輕似葉
高名千古重如山並遊英俊顏何厚未死姦諛骨已寒

天為吾皇扶社稷肯教夫子不生還

東軒筆錄唐介始彈張堯佐諫官皆上疏及彈文彥博則吳奎畏縮不前當時謂拽動陣腳及唐爭論于上前遂并及奎之背約執政又黜奎而文潞公益不自安遂罷政事時李師中送介詩有並遊英俊顏何厚未死姦諛骨已寒之句為奎發也

韓魏公席上作

願得貔貅十萬兵西戎巢穴一時平歸來不用封侯印
只問君王乞愛卿

后山詩話魏公為陝西安撫開府長安李待制師中過之席間使為官妓賈愛卿賦

偶題

燕子知時節還從舊宇歸
新人方按曲不許傍簾飛

東臯雜錄李誠之才致高妙守邊有威信熙寧初荆公用事議論不合退居汶上題詩云云

客有寫真者見予因以詩贈之

嗟予少也賤到老尚無功
方寸浮名外流年兩鬢中
對鏡猶慙愧圖寫若為客

聲畫集

詠松

半依崑岫倚雲端
獨上亭亭耐歲寒
一事頗為清節累

秦時曾作大夫官

鶴林玉露

麥積山

在天水縣東狀如麥積為秦地林泉之冠有魏竄避暑宮魏乙弗后墓

路入青松翠靄間斜陽倒影下溪灣此中猿鶴休相顧

謝傳東歸自有山

方輿勝覽

和李明叔理定道中

幽居日日數歸程已寫華嚴兩帙經門外初寒江氣白

嶺頭多雨燒痕青曾逢飯顆嘲山笠應載鷗夷笑井鉞

客土相思多引望天涯風景似新亭

桂林府志

魏瓘

瓘字用之歙州婺源人父羽奏補校書郎累官
集賢院學士廣東安撫使進龍圖閣直學士吏
部侍郎致仕卒

感懷

羸羸霜髮一衰翁蹤跡年來類斷蓬
萬里遠歸雙闕下一身閒在衆人中
螭頭賜對恩雖厚雉堞論功事已空
淮上有山歸未得獨揮清涕灑春風

湘山野錄魏瓘侍郎知廣州日大築子城儂智
高亂民逃于中獲生者衆朝廷嘉之自以論功
久不報故作是詩文潞公采詩進呈加龍圖閣
學士尹天府

句

誰言嶺外無霜雪何事秋來亦滿頭

五羊書事

湘山

熊知至

知至字意誠建陽人天聖中五舉不第歸隱龍

峯有集

贈王山人

閒拄瘦筇枝衣冠半異時入城人不識賣藥俗長疑飲
酒難逢醉餐松自止飢華峯千嶂裏常與白雲期

翰墨大全

句

樓臺上下火照火車馬往來人看人

觀燈

萬姓統譜

趙 槩

槩字叔平南京虞城人第進士累擢龍圖閣學
士知鄆州拜參知政事熙寧初轉吏部尚書以
太子少師致仕薨贈太子太師諡康靖

沔水燕談歐文忠公與趙少師槩同在中書及告老趙自南京訪文忠于潁上所居之西堂曰會老仍賦詩以志盛事時翰林呂學士公著方牧潁特置酒于堂宴二公文忠親作口號有金馬玉堂三學士清風明月兩閒人之句

挽老蘓先生

侍從推詞伯君王問子虛早通金匱學晚就曲臺書
泣時難駐琴亡韻亦疎臧孫知有後里閑待高車

蘇集附錄

郭稹

稹字仲微開封祥符人舉進士歷龍圖閣學士

權知開封府康定中嘗與王堯臣張觀李若谷
宋庠等修崇文總目

和樞密侍郎因看海棠憶禁苑此花最盛

朱闌明媚照橫塘芳樹交加枕短牆傳得東君深意態
染成西蜀好風光破紅枝上仍施粉繁翠陰中旋撲香
應為無詩怨工部至今含淚作紅妝

海棠譜

陸經

經字子履越州人仁宗朝集賢殿修撰有寓山

集

孔平仲談苑陸經多與人寫碑銘頗得濡潤人有問子履近日所寫幾何對曰近日所寫甚少

總在街上喝道行裏

魏道輔續東軒筆錄陸經學士坐謫流落歐陽文忠公憐其貧每與人作碑誌必先約令陸子履書欲以濡潤助之也由是子履書名亦自此而盛周平原序云公與歐陽文忠公周旋館閣詩文往復相與至厚惜不幸陷于朋黨屢起屢仆晚過裕陵方嚮于用則已老矣

贈丁元珍中允宰剡

塵土官曹幾處閒君今作邑好開顏落帆直上剡溪口

入境先登天姥山魚鳥半和風俗處雲霞多雜簿書間
雪晴須去尋安道莫作經宵興盡還

剡錄

晚泛秀水

落日進扁舟沿迴碧玉流未能追白鳥貪共數游鯈翠
壁玲瓏倒青天表裏浮誰湔世閒熱灑出洞庭秋

袁州府志

句

薄有田園歸去好苦無官況莫來休

為山陽令作
瑣高議

青

周鏞

鏞仁宗時人

五洩山

路入蒼烟九過溪
細穿曲曲到招提
天分五溜寒傾北
地秀諸峯翠插西
鑿徑破崖來木杪
駕泉鳴竹落槩題
當年老默無消息
猶有祠堂一杖藜

越詠

曾 諤

諤諸暨令

五洩山

五洩高寒插太清，銀河垂地落天聲。
玉虹貫日晴空見，驄馬翻瓢白晝傾。
作賦曾聞誇鴈蕩，乘槎應可到蓬瀛。
何當一叱乖龍起，手挽商霖洗甲兵。

越詠

郭亢

五洩山

不到此山三十年，重來風物自依然。
兩源秋色排千嶂，五級泉聲落半天。
絕唱傳聞諸老句，幽棲猶想默師禪。
迴頭迴與塵寰別，何必蓬萊始是仙。

越詠

張唐卿

唐卿景祐元年進士第一

句

一舉首登龍虎榜十年身到鳳凰池

古今詩話張唐卿進士第一人登科期集興國寺題句于壁有人續云君看姚暉并梁固不得朝官未可知後果終于京官

楊察

察字隱甫成都人景祐元年進士歷官知制誥

翰林學士權御史中丞端明殿學士戶部侍郎
三司使辛贈禮部尚書有集

別信州席上作

十二天辰數今宵席客盈位如星占野人若月分卿極
醉巫山側聯吟嶰管清他年為舜牧協力濟蒼生

東軒筆錄楊侍郎謫信州及召還有士子十二
人送于境上察即席賦詩皆用十二事而引諭
精切士子無能屬和者

鄭伯玉

伯玉字寶臣莆田人景祐元年進士撫州觀察
推官韓魏公薦為殿中侍御史有錦囊集

和王太傅游國清塘

寒日一觀眺四天雲色稀水風迎棹起沙鳥背人飛玉
縷鱸新膾金膏蟹正肥斜陽促歸旆那得戀漁磯

莆陽文獻

何邾

邾字聖從成都人景祐元年進士累遷殿中侍
御史歷龍圖閣學士出知外郡熙寧中以尚書

右丞致仕卒有廬江文集

邵氏聞見錄文潞公知成都喜行樂有飛語至京師御史何鄴字聖從蜀人上遣察之張少愚謂公曰無足慮因迎謁聖從于漢州有妓善舞聖從喜之問其姓曰楊聖從曰所謂楊臺柳也少愚取妓帕題詩云蜀國佳人號細腰東臺御史惜妖嬈從今喚作楊臺柳舞盡春風萬萬條數日聖從至成都頗嚴重潞公一日宴聖從迎妓歌前詞以勸酒聖從每為之醉竟無所問

益州學聖訓堂詩

益為藩捍西南隅物衆地大稱名都擇守來頒茲土政
治人頗與他邦殊差跌一有戾條教便宜皆得行黥誅

羣姦帖息不敢動無復弄兵覬穿窬任威或謂一時事
立政恐非長世圖豈無達識究是否重在改作徒嗟呼

仲翁

文翁字

裔孫有偉度敢決不以常文拘當官勇欲

除弊法伊憂內惻仁心乎視人無異遠方意威行惠政
還相須始時歲荒力賑救坐使餓殍成完膚既而為俗
思根本其在立學陳師謨大開儒庠務誨導秀民聳慕
紛來趨遂言謂署鴻生職使演經傳傳諸徒奏函一上
聞法座詔劄即日來諧俞詔云信汝辦治蜀緩任威罰

先文儒公心感激侈上賜刻在金石尊神謨覆之大廈
牂美稱日久傳著期無渝邦人承風為盛事觀者填道
來于于吁嗟多士其聽命勿即邪徑安夷塗師無訛聖
生率教信尚姬孔尊唐虞施之鄉邦勵雅俗仁誼得以
相持扶漢皇初始盛文學起自蜀國行中區本朝教化
視三代建元安可為齊驅吾君訓辭諭萬里義均盤誥
茲宣敷吾守教本樹一國學盛洙泗相涵濡臣謀君從
協大義聖哲倡和真同符欲歌盛節示萬古才不逮志

嗟其愚

成都文類

程師孟

師孟字公闢吳人景祐元年進士累官知廣州
召為給事中充直賢殿修撰判都水監出知越
州青州授光祿大夫致仕

寒食遊九仙烏石二山

城中無事喜尋山千里提封並海寬
賓客相從筵既冷
士民同出食猶寒
芳園病葉堆何限
古院閒花落幾般

誰道異鄉多感慨登臨遲卻十年官

淳熙三山志

楓橋寺

門對雲山畫不如師今一念六年居邇來寺好尤瀟灑
張繼畱題內翰書

自注今禹王內翰丁太夫人憂親寫是詩故不題名

遊楓橋偶成

晚泊橋邊寺迎風坐一軒好山平隔岸流水漫過門朱
舫朝天路青林對郭村主人頭似雪怪我到多番

以上吳郡志

遊玉尺山寺

永日清陰喜獨來，野僧題石作吟臺。
無詩可比顏光祿，

每憶登臨卻自回。

福州府志

次韻元厚之少保畱題朱伯原祕校園亭

碧瓦春城十萬家，可憐夫子獨堪嗟。
園林猶有前朝木，冠蓋難尋故主花。

園乃錢氏所創

亭瞰夕陽鄰古剎，池通野水

見晴沙。天然操尚無塵滓，合住蓬萊弄綵霞。

蘇州府志

丁寶臣

寶臣字元珍常州晉陵人景祐元年進士歷祕閣校理同知太常禮院出倅永州

和永叔新晴獨游東山

芳辰百五前選勝到林泉萬樹綠初染羣花紅未然陰巖猶貯雪暖谷自生烟婦汲溪頭水人耕草際田日中林影直風靜鳥聲圓健令多情甚尋春最占先

瀛奎律髓

五洩山

路緣蘿鳥蔭杉松翠碧丹崖不計重天作錦屏環十里

僧開珠屋面千峯花閒越鳥鉤輶語溪外秦人彷彿逢
早晚車駟到林下籃輿暇日待追從

越詠

題翠麓亭

諦看軒窗面翠微暫來登此已忘機地連佛寺樓臺古
泉落山田稻蟹肥曉徑忽穿清氣入夜船多載白雲歸
世人誰識紅塵外終老功名未拂衣

惠山古今考

柳永

永字耆卿初名三變崇安人景祐元年進士為

屯田員外郎以樂章擅名有兄三復三接皆工
文號柳氏三絕

藝苑雌黃柳三變喜作小詞薄於操行當時有
薦其才者上曰得非填詞柳三變乎曰然上曰
且去填詞由是不得志日與儔子縱遊倡館酒
樓閒無復檢率自稱云奉聖旨填詞柳三變
獨醒雜志柳耆卿風流俊邁聞于一時既死塋
于東陽縣花山遠近之人每遇清明日多載酒
肴飲于耆卿墓側謂之吊柳會
方輿勝覽范蜀公嘗曰仁宗四十二年太平鎮
在翰苑十餘載不能出一語歌詠乃于耆卿詞
見之仁宗嘗曰此人任從風前月下淺斟低唱
豈可令仕宦遂流落不偶卒于襄陽死之日家
無餘財羣妓合金塋之于南門外每春月上冢

謂之弔柳七

贈內臣孫可久

故侯幽隱直城東，草樹扶蘇一畝宮。
曾珥貂璫為近侍，卻餘條褐作閒翁。
高吟擁鼻詩懷壯，雅論盱衡道氣充。
厭盡繁華天上樂，始將蹤蹟學冥鴻。

青箱雜記

中峯寺

攀蘿躡石落崔嵬，千萬峯中梵室開。
僧向半空為世界，眼看平地起風雷。
猿偷曉果升松去，竹逼清流入檻來。

旬月經遊殊不厭欲歸回首更遲迴

建寧府志

鬻海歌

為晚峯鹽場官作

鬻海歌憫亭戶也

鬻海之民何所營婦無蠶織夫無耕衣食之源太寥落
牢盆鬻就汝輸征年年春夏潮盈浦潮退刮泥成島嶼
風乾日曝鹹味加始灌潮波堦成滴滴濃鹹淡未得閑
採樵深入無窮山豹蹤虎跡不敢避朝陽出去夕陽還
船載肩擎未遑歇投入巨竈炎炎熱晨燒暮爍堆積高

才得波濤變成雪自從瀦瀦至飛霜無非假貸充餽糧
秤入官中得微直一緡往往十緡償周而復始無休息
官租未了私租逼驅妻逐子課工程雖作人形俱菜色
鬻海之民何苦辛安得毋富子不貧本朝一物不失所
願廣皇仁到海濱甲兵淨洗征輸輟君有餘財罷鹽鐵
太平相業爾惟鹽化作夏商周時節

大德昌國州志

句

分得天一角織成山四圍

題會景亭

會稽志

馬遵

遵字仲塗樂平人景祐元年進士由臺諫轉吏部員外郎直龍圖閣卒

隱居詩話馬遵謫守宣州及其去也郡僚軍民爭欲駐留至以鐵鎖絕江遵于錢筵倚醉令官妓剝榷實而食春春若留連狀夜使人絕鎖解舟以水沃櫓牙使之不鳴逮曉舟去遠矣

再入臺作

連蹇多年心欲灰厭為俗吏走塵埃豈知黃紙新書下還送青氈舊物來武騎強為終不意河南難問媿無才

一麾早晚江湖去相與持螯共酒杯

饒州府志

呂 璚

璚字季玉晉江人景祐元年進士歷官光祿卿

威惠廟

陳元光父子有功於閩而史闕焉

當年平賊立殊勲時不旌賢事忍聞唐史無人修列傳

漳江有廟祀將軍

清源文獻

仲 訥

訥字樸翁定陶人景祐元年進士歷尚書屯田

員外郎有集

負暄閒眠

茅簷晴日暖於春
一枕鈞天樂事新
滿眼繁華皆得意
午眠安穩卻無人

宋文鑑

送唐子方

力犯雷霆衆共危
遠投魑魅獨為宜
忠州學業真無負
高廟神靈固有知
自倚聖明容直道
未甘憔悴死荒陬
滿朝卿相多公議
莫把文章作楚辭

事文類聚前集

揚謬

謬梓州人景祐元年進士

和燕龍圖海棠

西漢欺盧橘東陽愛海棠許昌奇此遇子美欠先揚杜
宇三春節蠶叢一國香燕脂點亂雨生色麗斜陽富豔
東君主暄妍白帝方錦樓移水色玉壘換山光風格林
檣細腰支郁李長天生笑容質時樣舞衣裳少吐深深
染全開淡淡妝烟媒護綠蒂風陣損朱房旋失因臨水

閒飄弗過牆佩亡愁殺甫簪脫即連姜蝶舞菱花照鶯
啼卷畫堂仙如弄玉少墜似綠珠常不見還成悔相思
幾欲狂春深濯錦水日晚浣紗坊臥對移簾押吟看近
筆牀池清滿園倒鳥起一枝昂紫燕銜泥急黃蜂趁蜜
忙化工真用意銷得與攜觴

海棠譜

句

願前明主席一問洛陽人

省試宣室受釐

行人問宮殿耕者得

珠璣

題驪山詩話

中山

草不驚皇轍山能護帝輿

省試蒲車溫

公詩話

吳中復

中復字仲庶興國永興人進士及第累官殿中
侍御史歷龍圖閣直學士出知成都

遊海雲寺唱和詩

并序

成都風俗歲以三月二十一日遊城東海雲寺摸石
於池中以為求子之祥太守出郊建高旗鳴笳鼓作
馳騎之戲大譙賓從以主民樂觀者夾道百重飛蓋

蔽山野讙謳嬉笑之聲雖田野閒如市井其盛如此
渤海吳公下車期月簡肅無事從俗高會于海雲酒
既中顧謂寮屬曰一觴一詠古人之樂事也首作七
言詩以寫勝賞席客亦有以詩獻者更相酬和得一
十三篇乃命幕下吏會稽王霽為之序

錦里風光勝別州海雲寺枕碧江頭連郊瑞麥青黃秀
遶路鳴泉深淺流彩石池邊成故事茂林坡上憶前遊

自注予昔陪樞密田公遊此

綠樽好伴衰翁醉十日殘春不少畱

歲華紀麗譜三月二十一日出大東門宴海雲
山鴻慶寺登衆春閣觀摸石蓋開元二十三年
靈智禪師以是日歸寂邦人敬之入山遊禮因
而成俗山有小池士女探石其中以占求子之
祥

成都西園十詠

存三首

西樓

信美他鄉地登臨有故樓清風破大暑明月轉高秋朝
暮岷山秀東西錦水流賓朋逢好景把酒為遲留

方物亭

草木蟲魚部披尋自古無飛沈天產異生植土風殊物
色隨心匠形容記繪圖虛亭玩真意浩思滿江湖

流杯亭

結客乘公暇流觴逐浩歌亂峯晴倒影曲水宛迴波小
海逢元已蘭亭記永和西州行樂事應比晉賢多

以上成都

文類

江左謂海棠為川紅

靚妝濃淡藥蒙茸高下池臺細細風卻恨韶華偏蜀土

更無顏色似川紅尋香只恐三春暮把酒欣逢一笑同
子美詩才猶閣筆至今寂寞錦城中

海棠譜

寄題錢公輔衆樂亭

賢侯新葺水雲鄉虛閣崢嶸綠渺茫波面長橋步明月
人家疎影帶殘陽風中白鳥侵烟去雨後紅蕖擁袖香
從此郡圖添故事歲時遺愛似甘棠

延祐四明志

覽齊山陳鴻斷碑

翠琰何年沈朽壤義師尋訪得其餘應同湘水斷碑字

難辨韓陵片石書
汨沒身名真夢幻
變遷時序易丘墟
收藏且作山中物
莫問陳鴻紀事初

森山詩集

陳薦

薦字彥升邢州沙河人
舉進士神宗朝累官龍
圖閣直學士河北都轉
運使進資政殿學士提
舉崇福宮卒贈光祿大夫

子房廟

博浪沙頭觸副車
潛游東夏識真符
風雲知略移秦鼎

星斗功名啟漢圖
商老已來寧少海
赤松還約訪仙都
雍容進退全天道
凜凜高風萬古無

燕子樓

僕射新阡狐兔遊
侍兒猶住水邊樓
風清玉簾慵敲枕
月好珠簾嬾上鉤
寒夢覺來滄海濶
新詩吟罷紫蘭秋
樂天才思如春雨
斷送殘花一夕休

桐江詩話陳舍人彥升有彭城八詠為人所稱
多以燕子樓為絕唱殊不知子房廟詩最為警
絕彥升高祖廟詩云塵靜山川狂鹿走雷驚天
地老龍飛范增墓詩云念失壯圖撞玉斗豈知

天命與金刀皆佳句也八詠今不傳于世惜哉

劉述

述字孝叔湖州人景祐三年進士歷荊州湖南
北京西路轉運使神宗立召為侍御史忤王安
石謫江州提舉崇禧觀卒紹興初贈祕閣修撰
仙巖洞禱雨今諸暨時作

英英洞口雲觸石纔一縷須臾徧空山霈然作霖雨

會稽志

五洩山

翠屏千疊水潺湲一簇青鷄香靄間惜是晚年逢此景
悔將前眼看他山瀑飛蘿磴終難畫龍蟄當雲只暫閒
薄宦勞人無計住明朝歸去又塵寰

越詠

題竹閣

竹閣寒相倚雲窗晚共閒閒身方外去幽鳥靜中來聲
響風隨籜陰移石上苔遲畱更清夜待月露盈杯

嚴州府志

葛密

密字子發江陰人官弟官太常博士

近造浮屠之悟空者覩君謨省主給事畱題詩板
列楣棟間粲然可誦因撫方袍之意成拙句以寄
昔年詩板著蓮宮筆力雄豪墨彩豐不日三階平國政
山僧應待碧紗籠

蔡忠惠公集附

元積中

積中錢唐人景祐初黃巖令熙寧初為司封郎
中直史館知桂州軍有江湖堂詩集

題桐柏觀

九峯魏絕亂雲屯石室瓊臺舊址存山險密盤之字徑
洞深高闕丙方門碧桃花爛春溪暖紫玉簫沈月榭昏
未覺仙家光景晚人閒歸去見來孫

赤城志

董淵

長樂令

靈峯院龍龕山和蔡君謨

礪礪彌沙界鎗鎗古洞天門鄰金布地橋枕玉鳴泉庭

鶴歸迷主龕龍去失年掃雲嫌俗駕題壁詫詩仙勝景
無今古居人有後先不知遊者馭誰見海為田

蔡忠惠公集附


劉嗣隆

嗣隆仁宗朝以尚書職方員外郎知袁州

宜春臺

一簇亭臺畫亦難公餘到此幾盤桓山高不似城中景
樹密尤宜雨後看風送江聲穿郡郭日推雲影下峯巒
當時吏部曾遊否何事無文石上刊

袁州府志



宋詩紀事卷十三

欽定四庫全書

集部

宋詩紀事卷十四

詳校官給事中臣鄧文泮

侍讀臣孫球覆勘

總校官進士臣繆琪

校對官中書臣朱斡

謄錄監生臣李學瞻

欽定四庫全書

宋詩紀事卷十四

錢塘厲鶚撰

蘇舜欽

舜欽字子美其先梓州人
家開封易簡孫耆子
舜元弟景祐中進士累遷
集賢校理監進奏院
坐用故紙錢除名居蘇州
買水石作滄浪亭以
自適終湖州長史卒有滄浪集

耆舊續聞蘇子美監奏邸舊例需故官券以賽
神因而宴客獨李定不預遂摺撫其事言于中

丞王拱辰御史劉元瑜迎合時宰之意興奏邸之獄一時英雋斥逐殆盡有一網打盡之語故梅聖俞有詩云一客不得食覆鼎傷衆賓蓋指李定也

王直方詩話子美嘗作春睡詩云身如蟬蛻一榻上夢似楊花千里飛歐公見之驚曰子美可念未幾果卒

淮中晚泊犢頭

春陰垂野草青青時有幽花一樹明
晚泊孤舟古祠下
滿川風雨看潮生

夏意

別院深深夏簟清
石榴開徧透簾明
樹陰滿地日卓午
夢覺流鶯時一聲

王直方詩話黃山谷最愛此二詩累書之或真草或大字

送人歸吳江

江雲春重雨垂垂
索莫情懷送客歸
不慣東流促迴棹
羨他雙燕逆風飛

天平山

吳會括衆山
戢戢不可數
其間號天平
突兀為之主
傑

然鎮西南羣嶺爭拱輔吾知造物意必以屏大府清溪
至峯前仰視勢飛舞偉石如長人肅立欲言路捫蘿緣
險磴爛漫松石古中腰有危亭前對翠峰舉石竇迸玉
泉泠泠四時雨源生白雲閒顏色若粉乳早年或播灑
潤可足九土奈何但澄澈未為應龍取予方棄塵中巖
壑素自許盤桓擇勝處至此快心膂養內聊自清終勝
甘於虎

過蘇州

東出盤門刮眼明蕭蕭疎雨更陰晴綠楊白鷺俱自得
近水遠山皆有情萬物盛衰天意在一身羈苦俗人輕
無窮好景無緣住旅櫂區區暮亦行

獨步滄浪亭

花枝低敲草生迷不可騎入步是宜時時攜酒只獨往
醉倒惟有春風知

石林詩話姑蘇州學之南積水彌數十頃傷有
小山高下曲折相望蓋錢氏時廣陵王所作既
積土為山因以為池潄水焉瑞光寺即其宅而
此其別圃也慶厯間子美謫廢以四十千得之

為居傍水作亭曰滄浪歐陽公詩所謂清風明月本無價可惜只賣四萬錢者是也子美既死其孤不能保遂屢易主矣

茗溪漁隱叢話此詩真能道幽獨閒放之趣

長橋觀魚

曙光東向欲朧明
漁艇縱橫映遠汀
濤面白烟昏落月
嶺頭殘燒暈疎星
鳴榔莫觸蛟龍睡
舉網時聞魚鼈腥
我實宦遊無況者
擬來隨爾帶笭箠

茗溪漁隱叢話元次山集自釋云帶笭箠而畫船注云上郎丁下桑茱切竹器也故唐書音訓云讀作郎桑見結本集音訓又音上力丁下息拯切取魚籠也然廣韻集韻于庚清青三韻皆

不收此箸字並于上聲迴字韻中收之蘇子美
黃魯直秦少遊皆于青字韻中押真誤也

秋日登閭門

年光冉冉催人老雲物涓涓又變秋家在鳳凰城闕下

江山何事苦相留

以上滄浪集

古今詩話子美自書此詩旁云江山留人也人
留江山也卒不用亦詩之識

南園

南園吳越廣陵王元璩之舊園也歲久摧圯
至元豐中猶有流杯四照百花樂堂惹雲風
月等處

西施臺下見名園百草千花特地繁欲問吳王當日事

後來桃李若為言

吳郡志

句

玉帳夜嚴冰似水茅齋春靜草如烟

窮居和長安帥葉清臣見寄西清

詩話

江休復

休復字鄰幾開封陳畱人舉進士克集賢校理
坐與蘇舜欽祠神會飲謫監蔡州稅久之復官
歷刑部郎中修起居注卒有集

詩話總龜江鄰幾善為詩清淡有古風蘇子美
坐進奏院事謫官後死吳中江作詩云郡邸獄
寃誰與辨臯橋客死世同悲用事精當嘗有古
詩云五十踐衰境如我在明年江天資淳雅喜
飲酒鼓琴圍棊人以酒台之未嘗不醉或不能
歸即宿人家商度風韻陶靖節之比云江嘗通
判廬州有酒官善琴以坐職不得出江旦旦就
之郡中沙門道士及里畝能棊者數人呼與同
住郡人見之習熟因畫為圖前列趨道一人騎
馬青蓋其後沙門道士褐衣數人葛巾芒履累
累相尋意思蕭散惜時無名手此畫不足傳後
何減稽阮也
歐陽公序云鄰幾學問通博文詞雅正詩尤清
淡閒肆可喜

秋懷

西風萬里至曠然天地秋暮雨生夕涼百蟲鳴啾啾楚
山曉蒼蒼楚水亦悠悠騷人試登臨感物增離憂所思
在遐方欲往路阻修香草有蕙芷嘉樹有梧楸白露委
芳馨彫零使我愁窮年倦羈窘江湖思舊遊紉蘭製茝
荷飄泛一葉舟肆情雲水閒意適何所求

同持國宿太學官舍

翳翳雲月薄泠泠雪風清學省夜岑寂天街斷人行廣
庭層閣陰尋廊步餘明松篠遞遙響如聞弦誦聲悠悠

子佩詩講座塵埃生迴就直舍休疊疊談道精心會境
物融泯然遺世營寒眠屢展轉寤言寫素誠

以上宋文鑑

王官谷司空侍郎故居

首陽采薇士商代緬以遐唐季有夫子遯世肥且嘉拔
迹離污險抗志凌青霞剝運扇頽風姦雄比回邪不然
隨波流橫噬猘猱牙吁哉土德衰睽乖鬼盈車英英夫
子賢顯晦吾所嗟相見棲隱情遺文寡菁華山藏白駒
谷水遶騷人家躊躇碧峯前寒日忽以斜

王官谷集

李絢

絢字見素邳州依政人第進士仕為太子中允
宰相杜衍拔寘臺省坐讒出知潤州累遷起居
舍人權判吏部流內銓卒

送天柱馮先生

閒馳風馭恣飄飄因失仙班幾度朝紫閣舊鄰秦樹老
赤城新別海山遙飛鳧又說春經嶽叱橘曾令夜探潮
不是桃源不歸去故人多半在烟霄

洞霄詩集

句

收得桑榆歸物外種成桃李滿人間

和杜相譜

歷代吟

王益柔

益柔字勝之曙子仁宗朝用蔭至殿中丞除集

賢校理坐蘇舜欽奏邸獄黜監復州酒累遷知

制誥兼直學士院以祕書監出知外郡

遙題錢公輔衆樂亭

四明舊說南湖好歲久瀕厓變涂潦建旗一日得賢侯

千里山川真再造，偃月隄成車馬道。
湖光如截天如抱，鴛鴦瓦影亂鳬鷺。
綠柳環隄花映島，珠宮貝闕競來還。
泉客鮫人爭獻寶，春風浩蕩波濤起。
髣髴仙人騎赤鯉，金盤下箸飽鱸魚。
塵事茫茫隔烟水，都人士女從如雲。
絲竹清音兩岸聞，飲酣落筆歌綠水。
爛漫天葩飄遠芬，延祐四明志

張羣

羣仁宗朝太常少卿

謫袁州道中寄蘇子美

憶昨共繫吳門舟我獨千里君獨畱江花粲爾不同醉
野月娟然增此愁談笑還令舌本強詩篇頓覺筆鋒柔
滄浪書信無消息鴻雁來時數舉頭

袁州府志

鮮于侁

侁字子駿閬中人景祐中進士乙科慶厯中遷
祕書丞神宗朝為利州路轉運使元祐初拜左
諫議大夫出知陳州卒紹聖閒與黨籍有諫議

集

郡齋讀書志旣治經術有法論著多出新意晚年為詩與楚詞尤工人以為有屈宋風

新堂夜坐月色皎然由連理亭信步庭中徘徊久

之因為五言一首

秋風動微涼天雨新霽後閒齋獨隱几明月在高柳振衣步庭下顥氣入襟袖天空雲漢明隱約辨列宿蒼蒼松檜上零露霏欲溜脫葉滿閒園繁華迨衰朽清宵望蟾彩宜付一杯酒多病謝尊壘城頭轉寒漏

宋文鑑

舜祠

道歷山兮逶蛇思古人兮感慨並儲胥兮肅止仰魯雲
兮晻曖獸何鳴兮林中鳥何悲兮山上木何為兮不翦
草何為兮茂暢帝之神兮在天帝之德兮在人物具兮
四海心精兮一純采秀實兮山閒摘其毛兮澗底玉醴
湛兮瓊茅肴脩雜兮蘭茝樂備兮九奏鳳舞兮儀韶人
駿奔兮如在君卒享兮神交

兗州府志

和文與可洋州園池

千峯起華陽一水連天漢初月正沈鉤隱然飛兩岸

湖橋

城上望南園園深知幾許啼鳥聞閒關遊人不知處

南園

琴躋積翠外締結穹窿閒軒楹最佳處四顧唯江山

樂二

榭

春歸閨風家巧入天匠手能將五色雲點綴當戶牖

披錦

亭 陝西通志

呂 溱

溱字濟叔揚州人寶元元年進士第一累擢知

制誥知杭州拜翰林學士神宗朝官至樞密直
學士提舉醴泉觀卒贈禮部侍郎

米芾書呂溱事云溱為人簡倨每接賓客不過
數言時人目為七字舍人

句

九霄離海嶠一夕過天池

試鯤化為鵬

東都事畧仁宗見此句曰此當作狀元升為第一

范鎮

鎮字景仁華陽人居洛陽寶元元年舉進士為

禮部第一累知制誥英宗立遷翰林學士神宗
朝歷端明殿學士提舉崇福宮封蜀郡公卒諡

忠文有集

東都事畧鎮為文清麗簡遠少時嘗賦長嘯卻
胡騎流傳契丹謂鎮為長嘯公
迂叟詩話范景仁喜為詩年六十三致仕一朝
思鄉里遂輕行入蜀故人呂才元大臨知梓州
景仁枉道過之歸至成都日與鄉人樂飲散財
于親舊之貧者遂遊峨嵋青城山下巫峽出荆
門凡期歲乃還京師在道作詩凡三百五篇其
一聯云不學鄉人誇驕馬未饒吾祖泛扁舟此
二事他人所不用也

仲遠龍圖見邀學射之遊先寄五十六言

幾年魂夢寄西州
春晚歸逢學射遊
十里香風塵不動
半山晴日雨初收
指揮赤隊呈飛騎
次第紅妝數勝籌
夾道綺羅瞻望處
管絃旌旆擁鰲頭

送羅勝卿同年提舉玉局觀

匹馬西歸去
知君得意偏
人情重鄉里
官職更神仙
曉後無衙鼓
旬頭有俸錢
何須駕白鶴
辛苦上青天

以上成都

文類

送張職方守筠州

職方名正子公紀亦守衢州

南國一麾守知公安此行家山雖萬里子舍只鄰城驛
問中宵至風謠接吟聲定應持課最同命到天京

方輿
勝覽

七夕

翠幙瑤梯百尺樓樓前星斗自悠悠天家仙會能多少

未到平明已別愁

合璧事類前集

再至史局

史局逾年別重來已涕零先書未絕筆又欲汗新青

合璧事類後集范蜀公少與柳耆卿同年愛其
才美聞作樂章嘗歎曰繆其用心謝事之後親
舊閒盛唱柳詞復歎曰仁廟四十二年太平吾
身為史官二十年不能贊述而耆卿能盡形容
之

黃葵

開時閒淡歛時愁
蘭蓓應容預
勝流剩欲持杯相顧
畧一庭風露不禁秋

合璧事類別集

韓太丞同守成都

春色草將深
春寒柳未陰
青天指行棧
綠水蕩離襟
後

乘何為託前旌喻此心南枝倦飛翼憑為寄歸音

全蜀藝文

志

雞鳴臺

在靈寶縣南齊田文客詐雞鳴度關處今人築臺

古人惟恃衆心城何事秦皇苦好兵本設函關禁姦詐
不知夜半有雞鳴

河南通志

和王都尉

慣乘霄漢鶴翻說淤泥蓮可惜玉臺處等閒閒幾年

式古堂書考王晉卿跋云公不喜釋氏故有是句亦可一笑也又云余前年恩移清潁道出許

呂前途小阻留西湖之別館者幾一月常與韓
持國范景仁泛舟嘯咏使人頓忘去國流離之
恨也韓公德性溫厚風度高雅固已可愛范公
雖老而精神不衰議論純正白須紅面動輒醺
酣時余有所賦詠公即取紅蓮葉命筆疾書初
不經思佳詞麗句頃刻而成坐客莫不驚歎也
比聞朝廷就除端明殿學士以寵之因思方今
進任老成如公者若再起之亦足以厚風俗耳

蘇 軾

軾字宣甫晉江人紳從弟寶元元年進士知邕
州儂寇至嬰城以守城陷自焚死贈奉國軍節
度使謚忠勇

英德碧落洞

此洞誰開鑿難窮造化原地幽疑窟室巖透若天閣
蘚石高低路樵聲裏外村雲嵐青欲滴烟壁翠堪捫一帶
谿泉急千枝石乳繁鼠飛猶白晝虎嘯近黃昏老木吟
風韻枯崖滲雨痕碧瀾秋寸寸寧負羽皇言

清源文獻

司馬光

光字君實陝州夏縣人以父池任入官寶元初
進士甲科累除知制誥改天章閣待制知諫院

英宗朝除龍圖閣直學士改右諫議大夫神宗
即位擢翰林學士判西京畱司御史臺拜資政
殿學士哲宗即位拜左僕射兼門下侍郎薨于
位贈太師溫國公諡文正有傳家集

澠水燕談司馬文正公高才全德大得中外之
望公之退十有餘年天下日冀其復用故子瞻
獨樂園詩曰先生獨何事四海望陶冶兒童誦
君實走卒知司馬蓋紀實也

孤臣泣血錄金人入汴駐青城索監書藏經如
資治通鑑蘇黃文集之屬皆指名取索當時朝
廷行下諸路盡毀坡谷著作姦黨傳會至欲焚
資治通鑑賴有神宗御製序文不敢毀而敵國

之敬重顧如此

侯鯖錄司馬文正公言行俱高然亦每有謔語
嘗作詩云由來獄吏少和氣臯陶之狀如削瓜
困學紀聞司馬公早朝詩太白明如李出漢天
文志熒惑踰歲星居其東北半寸所如連李又
即事云雨不成遊布路歸出左傳自朝布路而
罷今集皆注云恐誤蓋不考也

謝孫興宗惠草蟲扇

吳僧畫團扇點綴成微蟲秋毫宛皆具獨竊天地功細
者及蛛螫大者纔阜螽枯枝擁寒蛸黃蘗黏飛蜂翾然
得生意上下相追從徒觀飛動姿寧覩筆墨蹤兒曹取

真物細校無不同恐其遂躍去亟取藏箱中乃知藝無
小意精神可通不興誤圖蠅能感紫髯翁子猷狀蟬雀
藏本傳河東不知古何如此畫今人雄僧亡已云久其
徒頗能工舊法存百一要足超凡庸友人幸為賜物薄
意何隆玩之不替手愛重心無窮常如對君子穆穆來
清風

送張兵部中庸知遂州

劔嶺橫千古棧微相如重駕傳車歸雙親倚門望已久

千騎踏雪行如飛人閒富貴非不有似君榮耀世亦稀
聞道西州遺像在使我涕泗空霑衣

先人知小溪縣正
版籍均賦役聞邑

人誦之畫像猶存

衆樂亭

在鄞縣西湖中錢公倚所建

橫橋通廢島華宇出荒榛風月逢知己湖山得主人使
君如獨樂衆庶必深顰何以知家給笙歌滿水濱

送章伯鎮知湖州

江外饒佳郡吳興天下稀
蓴羹紫絲滑鱸膾玉花肥
星

斗寒相照烟波碧四圍柳侯還作牧草樹轉清輝

皇后閣春帖子

慶壽風烟接未央飛樓複道鬱相望春來無以消長日
閒取經書教小王

夫人閣春帖子

聖主終朝視萬機燕居專事養希夷千門永晝春岑寂
不用車前插竹枝

以上傳家集

詩林廣記司馬公此帖亦皆寓諷勸之意

始至洛中言懷

三十餘年西復東，勞生薄宦等飛蓬。
所存舊業唯清白，不負君恩有朴忠。
早避喧煩真得策，未逢危辱好收功。
太平觸處農桑滿，贏得閭閻鶴髮翁。

石林詩話：溫公熙寧間自長安得請，留臺而歸作。

過堯夫天津居

草輒波清沙路微，手攜筇杖著深衣。
白鷗不信忘機久，見我猶穿柳岸飛。

開見前錄公判西京雷司御史臺遂居洛買園
于尊賢坊以獨樂名之嘗謂康節曰光陝人先
生衛人今同居洛即鄉人也有如先生道學之
尊當以年德為貴官職不足道也一日著深衣
自崇德寺書局散步洛水隄上因過天津之居
謁曰程秀才云既見溫公也問其故笑曰司馬
出程伯休父故曰程

耆英會

洛下衣冠愛惜春相從小飲任天真隨家所有自可樂
為具雖微誰笑貧不待珍羞方下筯只將佳景便娛賓
庾公此興知非淺藜藿終難作主人

作真率會伯康君從七十八歲安之七十七歲正
叔七十四歲不疑七十三歲叔達七十歲光六十
五歲合五百一十歲口號成詩用安之前韻

七人五百有餘歲同醉花前今古稀走馬鬪雞非我事
紵衣絲髮且相輝

經春無事連翩醉彼此往來能幾家切莫辭斟十分酒
儘從他笑滿頭花

以上洛中耆英會詩

和景仁卜居許下景仁頃見許居洛今而倍之故

詩頗致其怨

壯齒相知約歲寒
索居今日鬢俱斑
拂衣已解虞卿印
築室何須謝傅山
許下田園雖有素
洛中花卉足供閒
他年決意歸何處
便見交情厚薄間

次韻謝杜祁公借觀五老圖

脫遺軒冕就安閒
笑傲丘園縱倒冠
白髮憂民雖種種
丹心許國尚桓桓
鴻冥得路高難慕
松老無風韻自寒
聞說優遊多唱和
新篇何惜畫圖看

鐵網珊瑚

句

烟曲香尋篆杯深酒過花

明道雜志

石揚休

揚休字昌言眉山舉進士歷刑部員外郎知

制誥同判太常寺遷工部郎中卒

鶚按司馬溫公詩自注云

釋褐昌言除同州推官光華州判官是與溫公同年也

東都事畧揚休喜閒放平居養猿鶴收圖書以自適工于詩什世稱其才

謝文瑩師攜琴見訪

鄭衛湮俗耳正聲追不回誰傳廣陵操老盡嶧陽材古
意為師復清風尋我來幽陰竹軒下重約月明開

湘山野錄皇祐閒館中詩筆石揚休最得唐人
風格

海棠

開盡妖桃落盡梨淺萼深萼照華池都緣西蜀盤根遠
豈是東君屬意遲烟慘別容醺宿酒露凝啼臉涇臙脂
須知賈相風流甚曾許神仙品格奇

海棠譜

呂公著

公著字晦叔夷簡子舉進士累遷殿中丞神宗
朝官資政殿大學士哲宗即位拜右僕射兼中
書侍郎元祐三年拜司空同平章軍國事薨贈
太師中國公諡正獻入黨籍有集

分題得癭木壺

天地產衆材任材謂之智棟桷與楹杙小大無有棄方
者以矩度圓者中規制嗟爾木之癭何異肉有贅生成
擁腫姿賦象難取類槩括所不施鉤繩為爾廢大匠睨

而往惻然乃有意孰非造化功而終朽不器剗剔虛其中朱漆為之偽料漿挹酒醴施用惟其利犧象非不珍金罍非不貴設之于楹階十目皆注視幸因左右容及見為奇異人之于才性夫豈遠于是性雖有不善在教之揉勵才亡不可用由上所措置飾陋就其長皆得為良士執一以廢百衆功何由備是惟聖人心能通天下

志
宋文鑑

風月堂詩話歐公居潁上申公呂晦叔作太守
聚星堂燕集賦詩分韻公得松字申公得雪字

劉原父得風字魏廣得春字焦千之得石字王
回得酒字徐無逸得寒字又賦室中物公得鸚
鵡螺杯申公得瘿木壺劉原父得張越琴魏廣
得澄心紙焦千之得金星硯王回得方竹杖徐
無逸得月硯屏風又賦席間果公得橄欖中公
得紅蕉子劉原父得溫柑魏廣得鳳棲焦千之
得金橘王回得荔枝徐無逸得楊梅又賦壁間
畫像公得杜甫申公得李文饒劉原父得韓退
之魏廣得謝安石焦千之得諸葛孔明王回得
李白徐無逸得魏鄭公詩編成一集流行于世
當時四方能文之士及館閣諸公皆以不與此
會為恨

南窗紀談歐公稱賞此詩以為有宰相器

呂公弼

公弼字賓臣夷簡仲子賜進士出身歷樞密直
學士知成都府神宗朝進樞密使出知外郡為
西太一宮使薨贈太尉諡惠穆

琴臺

煙樹重城側琴臺千古餘早為梁苑客晚向茂陵居賦
給尚書筆歸乘使者車清風覲舊隱長自聳鄉閭

嚴真觀

卜肆垂簾地依然門徑開沈冥時已往思慕客猶來鳥

啄虛簷壞狐穿古井推空餘舊磯石歲歲長春苔

以上成都

文類

趙衆

衆官龍州簽判與司馬溫公同時

題倅廳吏隱堂

滿耳江聲滿目山此身疑不在人寰民舍古意村村靜

吏束刑書日日閒

方輿勝覽

張徵

徵字百常陳畱人寶元元年進士甲科

自然亭

久雨妨漁復滯樵自然亭上一逍遙萬緣不是閒中起
百事唯于睡裏消老去自知如蠟蠅病來誰悟似芭蕉
愛名之世忘名客幸有山林舊市朝

瀛奎律髓

書故三司副使陳公亞之詩軸後

款題元豐三年

破錦囊開玉振金舍人胸次右丞心為時黼藻衣冠藪
與國丹青翰墨林慷慨似誰雙舞劍風流隨處一歌琴

燕貽苦志追先烈子夏何須論淺深

鐵網珊瑚

吳充

充字沖卿建安浦城人育弟寶元元年進士熙
寧中累遷檢校太傅樞密使代王安石為中書
門下平章事監修國史罷為觀文殿大學士西
太一宮使卒贈司空兼侍中謚正獻

聽讀詩義感事

時修撰經義所初進二南有旨資
政殿進讀

雪銷鵲鵲御溝融燕見殊恩綴上公晝日乍驚三接寵

正風獲聽二南終解頤共仰天顏喜牆面才容聖域通
午漏漸長知禹惜侍臣何術補堯聰

王荆文公詩自注

史院席上作

蘭臺開史局玉帛賜君餘賓友求三事規摹本八書汗
青裁倣此衰白盍歸歟詔許從容會何妨醉上車

揮麈後錄神宗朝詔修仁英兩朝國史開局日
詔史院賜筵時吳冲卿為首相提舉二府及修
史官就席上成詩冲卿唱首

送張君宰吳江

全吳風景好之子去弦歌夜犬驚胥少秋鱸餉客多縣樓疑海蜃衙鼓荅江鼉遙想晨鳧下長橋正綠波

明道雜志

題招提院靜照堂

人說招提好師從靜照來親攜玉堂句徐叩華門開好事能如此題詩豈易哉明年得東守繫舸一裴回

至元嘉禾

志

遙贈錢公輔

使君新自四明歸邀我同為衆樂詩山川可愛惜未見

畫想夕思心為罷恍然神遇若有得齋身乃在天之涯
漲海連空四無岸天吳卻坐鮫人觀以手揮弄日月丹
能令桑田變瀾漫海邊偶到山城中山城二月多春風
牛羊閒暇夕陽晚樓閣參差朝霧濃一泓山溜佛頭綠
環以翠屏風六曲人烟擾擾事嬉遊落花啼鳥滿汀洲
中為臺榭闢十二上有藻井排文楸旁人指點此何許
云是四明行樂處此樂為民非為身始知集賢錢使君
使君風韻誰之比政事次公詩短李醉憑熊軾勸耕疇

狂取螺杯翻舞袂儂愛使君君勿歸詔書奪去何如為
閒侍玉皇香案側銀臺深阻無消息意迷卻悟坐空齋
忽省君詩昨日來疊紙為君書所見不知衆樂誠然哉
延祐四明志

宋敏求

敏求字次道綬子賜進士第為館閣校勘治平
中知制誥神宗朝忤王安石以右諫議大夫奉
朝請尋除史館修撰集賢院學士加龍圖閣學

士卒贈禮部侍郎有書闡前後集西垣制辭文集

史院席上奉和首相吳公元韻

二聖垂鴻烈天臨四紀餘元台來率屬賜會寵刊書世業叨榮甚君恩可報歟衮衣相照爛歸擁鹿鳴車

揮塵後錄

題招提院靜照堂

叢林起新構燕坐水雲鄉本自禪心靜能令世界忘幡花圍畫永鐘梵度宵長歸祴新篇富籠紗映寶坊

至元嘉禾

薛利和

利和字天益興化人寶元元年進士歷知春潮
惠三州遷屯田員外郎

謝王介甫

一路生靈陡頓貧廟堂康濟豈無人君侯若問茶租日
請把茶租乞與人

莆陽文獻熙寧二年王安石議權茶欲擢利和
提舉廣東茶事利和作詩謝之云云遂就常調

通判廣州茶法卒不行

柳應辰

應辰武陵人寶元元年進士仕至尚書都官員
外郎永州通判

刻浯溪石上

浯溪石上大江邊
心記閒將此地鐫
自有後人來屈指
四千六百甲寅年

容齋五筆浯溪石上有大押字題云押字起于
心心之所記人不能知大宋熙寧十年甲寅歲

武陵柳應辰仍有詩云云閬中陳思跋云柳都官欲以怪取名者所至留押字盈丈莫知其何為押字古人書名之草者施于文記以自識別耳今鐫刻廣博如許已可怪矣好事者謂能祛逐不祥真大可笑

邵必

必字不疑丹陽人元從父寶元元年進士官龍圖閣直學士知成都

題錢公輔衆樂亭

海邊民物鮮歡娛太守經營與衆俱園圃新陰多杞柳

池塘生意足魚蒲長空不礙高飛鵲淺水兼容短脰鳬
此樂有誰知我趣歸來紅旆日西晡

延祐四明志

裴若訥

若訥常州江陰人寶元元年進士

江陰絕句

紫萼江上是吾家一葉扁舟一釣車何必陶公種魚法

雨汀烟渚盡生涯

錦繡萬花谷

宋詩紀事卷十四